

中山篤錄



欽定古今圖書集成

方輿彙編  
山川典

欽定古今圖書集成方輿彙編山川典

第五十五卷目錄

嵩山部彙考一

圖

考



山川典第五十五卷



嵩山部彙考一

中嶽嵩山

書曰外方詩曰崧高爾雅曰中嶽史記曰太室漢書曰崑高要皆一山也其山在今河南省河南府登封縣北五里於天地爲正中歷代皆有勅祭



中嶽嵩山圖





古今圖書集成  
考

按書經夏書禹貢熊耳外方桐柏至于陪尾傳四山  
相連東南在豫州界疏正義曰嵩高山在潁川嵩高  
縣古文以為外方山

按詩經大雅崧高崧高維嶽駿極于天維嶽降神生  
甫及申傳崧高貌山大而高曰崧嶽四嶽也東嶽岱  
南嶽衡西嶽華北嶽恆堯之時姜氏為四伯主四嶽  
之祀述諸侯之職於周則有甫有申有齊有許也駿  
大極至也嶽降神靈和氣以生申甫之大功疏正義

曰崧者山形竦然故為高貌劉熙釋名云崧竦也亦  
高稱也山大而高曰崧釋山文李巡曰高大曰崧郭  
璞曰今中岳嵩高山蓋依此名是也

按爾雅釋山山大而高崧註今中嶽嵩高山蓋依此  
名疏詩大雅云崧高維嶽毛傳云崧高貌釋名云崧

竦也亦高稱也李巡曰高大曰崧此則山高者自  
名崧本不指中嶽今之中嶽名嵩高或取此文以立  
名乎無正文故云蓋以疑之

嵩高為中嶽註大室山也疏按山海經云半石山東

古今圖書集成  
五千里曰少室山又東三十里曰泰室山郭註云卽中嶽嵩高山也今在陽城縣西戴延之西征記云其山東謂之大室西謂之少室相去十七里嵩其總名也以其下各有室焉故謂之室是也

按山海經中山經凡縞羝山之首自平逢之山至于陽華之山凡十四山七百九十里嶽在其中以六月祭之如諸嶽之祠法則天下安寧註六月亦歲之中

釋義中嶽嵩山也祭嵩而以六月郭氏所謂亦歲之中是也

放臯之山又東五十七里曰大誓之山多瑇瑁之玉多麋玉有草焉其狀葉如榆方莖而蒼傷其名曰牛傷其根蒼文服者不厥可以禦兵其陽狂水出焉西南流注于伊水其中多三足龜食者無大疾可以已腫註今吳興陽羨縣有君山山上有池水中有三足六眼龜龜三足者名賁

又東七十里曰半石之山其上有草焉生而秀其高丈餘赤葉赤華華而不實其名曰嘉榮服之者不霆來需之水出於其陽而西流注于伊水其中多鱸魚



古今圖書集成  
黑文其狀如鮒食者不睡合水出于其陰而北流注于洛多騰魚狀如鰕居遠蒼文赤尾食者不癰可以爲瘿

又東五十里曰少室之山百草木成困其上有木焉其名曰帝休葉狀如楊其枝五衢黃華黑實服者不怒其上多玉其下多鐵休水出焉而北流注于洛其中多鯀魚狀如蟄蝓而長距足白而對食者無蠱疾可以禦兵註今在河南陽城西俗名季室

又東三十里曰秦室之山其上有木焉葉狀如黎而

赤理其名曰栳木服者不妬有草焉其狀如茱白華黑實澤如蓂蓂其名曰蓂草服之不昧上多美石註卽中嶽嵩高山也今在陽城縣西

嬰梁之山又東三十里曰浮戲之山有木焉葉狀如樗而赤實名曰亢木食之不蠱汜水出焉而北流注于河其東有谷因名曰蛇谷上多少辛註此中出蛇故名之少辛細辛也

苦山少室太室皆冢也其祠之太牢之具嬰以吉玉其神狀皆人面而三首其餘屬皆豕身人面也

古今圖書集成  
海內東經潁水出少室少室山在雍氏南入淮西鄆  
北一曰緱氏註今潁水出河南陽城縣乾山東南經  
潁川汝陰至淮南下蔡入淮鄆今鄆陵縣屬潁川緱  
音鉤縣屬河南

按史記封禪書昔三代之君皆在河洛之間故嵩爲  
中嶽而四嶽各如其方自殺以東名山五曰太室太  
室嵩高也

按漢書地理志潁川郡密高註武帝置以奉太室山  
是爲中嶽有太室少室山廟古文以密高爲外方山

師古曰密古崇字

按甘石星經填星主嵩山豫州

按後漢書郡國志潁川郡陽城有嵩高山註山海經  
謂爲太室之山禹貢有外方山鄭元毛詩譜云外方  
之山卽嵩也孟子曰益避禹之子於箕山之陰注云

嵩高之北

按白虎通巡狩篇中央爲嵩山

按風俗通義五嶽篇中央曰嵩高嵩者高也詩云嵩  
高維嶽駿極于天廟在潁川陽城縣



古今圖書集成  
按魏書地形志陽城郡陽城註一漢屬潁川晉屬河南後罷正光中復屬有少室山嵩高山許由墓啓母廟

按水經禹貢山水澤地所在嵩高爲中嶽在潁川陽城縣西北注春秋說題辭曰陰含陽故石凝爲山國語曰禹封九山山土之聚也爾雅曰山大而高曰崧合而言之爲崧高分而名之爲二室西南爲少室東北爲太室嵩高山記曰山下巖中有一石室內云自然經書自然飲食又云山有玉女臺言漢武帝見因

以名臺

外方山嵩高是也

洛水又東過洛陽縣南伊水從西來注之注洛水又

東合水南出半石之山北逕今水塢疑作合水而東北流

注于公路澗但世俗音譌號之曰光祿澗非也上有

袁術固四周絕澗迨遞百仞廣四五里有一水淵而

不流故谿澗卽其名也合水北與劉水合水出半石

東山西北流于劉聚三面臨澗在緱氏西南周畿內

劉子國故謂之劉澗其水西北流注于合水合水又

古今圖書集成  
北流注于洛水也

又東過偃師縣南

注

洛水東逕計素渚中朝時百國

貢計所頓故渚得其名又東偃師故縣南與緱氏分水又東休水自南注之其水導源少室山西流逕穴山南而北與少室山水合水出少室北溪西南流注休水休水又左會南谿水發大穴南山北流入休水休水又西南北屈潛流地下其故瀆北屈出峽謂之大穴口北歷覆釜堆東蓋以物象受名矣又東屈零星塢水流流字似衍潛通重源又發側緱氏原開山圖謂

之緱氏山也亦云仙者昇焉言王子晉控鶴斯阜靈王望而不得近舉手謝而去其家得遺屣俗亦謂之爲撫父堆堆上有子晉祠或言在九山非此世代已遠矣莫能辨之劉向疑脫列字仙傳云世有簫管之聲焉休水又逕延壽城南緱氏縣治故滑費春秋滑國所都也王莽更名中亭卽緱氏城也城有仙人祠謂之仙人觀休水又西轉北屈逕其城西水之西南有司空密陵光侯鄭廟碑文缺不可復識又有晉城門校尉昌原恭侯鄭仲林碑晉皇始六年立休水又北流



注于洛水洛水又東逕百谷塢北戴延之西征記曰塢在川南因而宋本作高為塢高一十餘丈劉武王西入長安舟師所堡也

洛水又東逕訾城北又東羅水注之注出方山羅川

西北流蒲池水注之疑脫水字出南浦陂西北流合羅水

謂之長川羅亦曰羅中也蓋盼子鄴羅之宿居故川

得其名耳羅水又西北白馬谿水注之水出崧山北

麓逕白馬塢東而北入羅水西北流白相澗水注之

水出嵩麓桐谿北流逕九山東又北九山東谿水入

焉水出百稱山東谷其山孤峰秀出嵯嶢分立伸長

統曰昔密有十城者身遊九山之上放心不拘之境

謂是山也山際有九山廟廟前有碑云九顯靈府君

者太華之元子陽九列名號曰九山府君也南據崧

岳北帶洛澗晉元康二年九月太歲庚午帝遣殿中

中郎將關內侯樊廣緱氏令王與傳演宋本作緱氏

傳奉宣詔命興立廟殿焉又有百蟲將軍顯靈碑碑

云將軍姓伊氏諱益字墮斨帝高陽之第二子伯益

者也晉元康五年七月七日順人吳義等建立堂廟

古今圖書集成  
永平元年二月二十日刻石立頌贊示後賢矣其水  
東北流入白相澗又北逕袁公塢東蓋公路始固有  
此也故有袁公之名矣北流注于羅水羅水又西北  
逕袁公塢北又西北逕潘岳子父墓前有碑岳父茆  
琅琊太守碑石破落文字缺敗岳碑題云給事黃門  
侍郎潘君之碑碑云君遇孫秀之難闔門受禍故門  
生感覆醢以增慟乃樹碑以記事太常潘尼之辭也  
羅水又於訾城東北入於洛水也  
灑水出灑強縣南澤中東入潁注灑水出潁川陽城

縣少室山東流注于潁水而亂流東南逕臨潁縣西  
北小灑水出焉東逕臨潁縣故城北灑水又東逕灑  
陽城北又東逕灑強縣故城南建武元年世祖封揚  
化將軍堅鐔爲侯國灑水東爲陶樞陂余按灑陽城  
在灑水南然則此城正應爲灑陰城而有灑陽之名  
者明在南猶有灑水故此城以陽爲名矣潁水之南  
有二瀆其南瀆東南流行歷臨潁亭西東南入汝今  
無水也疑卽灑水之故瀆矣汝水於奇雒城西別東  
派時人謂之灑水東北流枝瀆右出世謂之死汝也



古今圖書集成  
別汝又東北逕名陵城北練溝出焉別汝又東汾溝出焉別汝又東逕征羌城北水南有汾陂俗音糞汾水自別汝東注而爲此陂水積征羌城北四五里方三十里許瀆左合小瀝水水上承狼陂南流名曰鞏水清陵陂水自陂東注之東迴又謂之小瀝水而南流注于大瀝水大瀝水取稱蓋藉瀝汾注而總受巨

宋本作其

日矣又東逕西華縣故城南又東逕汝陽縣故

城北東注於潁

潁水出潁川陽城縣西北少室山

注

始皇十七年滅

韓以其地爲潁川郡蓋因水以著稱者也漢高帝二年以爲韓國王莽之左隊也山海經曰潁水出少室山地理志曰出陽城縣陽乾山今潁水有三源奇發右水出陽乾山之潁谷春秋潁考叔爲其封人其水東北流中水導源少室通阜東南流逕負黍亭東春秋定公六年鄭伐馮滑負黍者也馮敬通顯志賦曰求善卷之所在遇許由於負黍京相璠曰負黍在潁川陽城縣西南二十七里世謂之黃城也亦或謂是水爲瀝水東與右水合左水出少室南谿東合潁水

古今圖書集成  
故作者乃舉二三言水所發也呂氏春秋曰卞隨恥受湯讓自投此水而死張顯逸民傳嵇叔夜高士傳並言投河水而死未知其孰是也

又東南過其縣南注潁水又東五渡水注之其水導

源崇

一作嵩

高縣東北太室東谿縣漢武帝置以奉太

室山俗謂之崧陽城及春夏雨泛水自山頂而迭相灌澍崦流相承爲二十八浦也陽旱輟津而石潭不耗道路遊憩者唯得餐飲而已無敢澡盥于其中苟不如法必數日不豫是以行者憚之山下大澤周數

里而清深肅潔水中有立石高十餘丈廣二十許步

上甚平整緇素之士多泛舟昇陟取暢山當作情其

水東流南陽城西石溜縈委溯者五涉故亦謂之五

渡水東南流入潁水潁水逕其縣故城南昔舜禪禹

禹避商均伯益避啓並於此也亦周公以土圭測日

景處漢成帝末始元年封趙臨爲侯國也縣南對箕

山山上有許由冢堯所封也故太史公曰余登箕山

之上有許由墓焉山下有牽牛墟側潁水有犢泉是

巢父

一作樊父

還牛處也石上犢跡存焉又有許由廟碑



闕尚存是漢潁川太守朱寵所立潁水逕其北東與龍淵水合其水導源龍淵東南流逕陽城北又東南入于潁潁水又東平洛谿水注之水發玉女臺下平洛澗世謂之平洛水呂忱所謂勺水出陽城山蓋斯水也又東南流注于潁潁水又東出陽城關歷康城南魏明帝封尚書右僕射衛臻爲康鄉侯此卽臻封邑也

洧水出河南密縣西南馬領山注水出山下亦言出潁川陽城山山在陽城縣之東北蓋馬領之統目焉

清水東南流逕一故臺南俗謂之陽子臺又東逕馬領塢北在山上塢下泉流北注亦謂洧別源也而入於洧水洧水東流綏水會焉水出方山綏谿卽山海經所謂浮戲之山也東南流逕漢弘農太守張伯雅墓塋四周壘石爲垣隅阿相降列於綏水之陰庚門表二石闕夾對石獸於闕下冢前有石廟列植三碑碑云德字伯雅河內密人也碑側樹兩石人有數石柱及諸石獸舊引綏水南入塋城而爲池沼沼在丑地皆蟾蜍吐水石隍承溜池之南又建石樓石廟前

古今圖書集成  
又翼列諸獸但物謝時淪凋毀殆盡矣富而非義比  
之浮雲况復此乎王孫士安斯爲達矣綏水又東南  
流逕上郭亭南東南注洧水洧水又東襄荷水注之  
水出北山子節谿亦謂之子節水東南流於洧洧水  
又東會瀝滴泉水出深谿之側泉流丈餘懸水散注  
故世士以瀝滴稱南流入洧水也

按唐書天文志柳在輿鬼東又接漢源當商洛之陽  
接南河上流七星係軒轅得土行正位中嶽象也河  
南之分

角亢壽星也自原武管城濱河濟之南東至封丘陳  
畱盡汝南之地逾淮源至于弋陽西涉南陽郡至于  
桐柏又東北抵嵩之東陽當洛邑衆山之東與亳土  
相接次南直潁水之間曰太昊之墟爲亢分

地理志河南府河南郡登封註畿本嵩陽貞觀十七  
年省入陽城永淳元年營奉天宮分陽城緱氏復置  
二年省光宅元年復置萬歲登封元年更名神龍元  
年曰嵩陽二年復曰登封嵩山有中嶽祠有少室山  
有三陽宮聖曆二年置



古今圖書集成  
按杜光庭洞天福地記第六洞中嶽嵩山周廻三千里名思真之天在洛州少室山在東都

按地理通釋十道山川攷河南名山嵩在河南府登封縣北八里漢潁川密高縣也一曰太室山是爲中嶽註晉司馬侯曰太室九州之險也漢武帝禮登太室郡縣志東曰太室西曰少室嵩高總名卽中嶽也山高二十里周廻一百三十里少室山在縣西十里啓母祠縣東北七里漢武帝祀中嶽見夏后啓母石是也

少室在河南府登封縣西十里漢潁川密高縣也在告成縣西北五十里漢陽城縣述征記漢武築登仙臺

按金史地理志南京路河南府登封註有太室山箕山陽城山少室山

按三才圖會嵩嶽圖考嵩高山者五嶽之中嶽也在河南府釋名云嵩字或爲崧山大而高曰崧白虎通云中央之嶽獨加高字者何嶽居四方之中而高故曰嵩高山漢武帝登中嶽聞有呼萬歲聲於是以三

古今圖書集成  
百戶封奉祠命曰崇高邑至後漢靈帝復改崇高爲  
嵩高焉戴延之西征記云其山東謂太室西謂少室  
相去十七里嵩其總名也謂之室者以其下各有石  
室焉少室高八百六十丈上方十里與太室相次雜  
道書云自嶽神廟東北二十里至一山名曰東龍門  
其東有三臺山昔漢武東巡過此山見學仙女遂以  
名焉南有許由山高大四絕其北有潁水卽堯聘許  
由處猶有壇墀昔周靈王太子晉吹笙作鳳鳴遊伊  
洛間道人浮丘公接上嵩山三十餘年往來緱氏山

近在嵩山之西也漢世有道士從外國將貝多子來  
於嵩高西麓種之有四樹與衆木異一年三花白色  
香美

按河南通志山川嵩山在河南府登封縣北十里五  
嶽之中嶽也古名外方山亦名崧高山其山二尖峰  
左曰太室右曰少室嵩其總名謂之室者以其下各  
有石室中嶽居四方之中而高故名嵩高詩曰崧高  
維嶽峻極于天是也

按河南府志山川嵩高山在登封縣北五里詩曰嵩



古今圖書集成  
高維嶽峻極于天居五嶽之中故爲中嶽漢武帝改名  
密高漢地理志曰密高有太室山少室山戴延之  
西征記曰東爲太室西爲少室嵩其總名也

太室山在登封縣北五里西征記曰謂之室者以其  
下各有石室焉中峯卽嵩頂唐武曩立封禪壇於其  
上有天門石樓玉女牕搗帛石定心石三醉石高登  
崖諸勝其山二十四峯乃青童峯黃蓋峯浮丘峯三  
鶴峯遇聖峯萬歲峯玉鏡峯獅子峯虎頭峯起雲峯  
鳳凰峯金壺峯華蓋峯元龜峯臥龍峯會仙峯子晉

峰玉柱峰老翁峰玉人峰玉女峰獨秀峰積翠峰太  
白峰

少室山在登封縣西十七里一名季室郡國志又名  
負黍山有負黍城在其南敬通賦云遇許由於負黍  
卽此輿地志亦稱此山爲御砦金宣宗曾屯兵其上  
因名唐人作石淙序有少室若蓮之句至今遠近亦  
稱少室爲九頂蓮花砦其山計三十六峯爲朝嶽峯  
望洛峯太陽峯少陽峯石城峯石笋峯檀香峯丹砂  
峰鉢盂峰香爐峰連天峰紫霄峰羅漢峰七佛峰靈

古今圖書集成  
隱峰來仙峰清涼峰寶勝峰瑞應峯瓊壁峯紫蓋峰  
翠華峯藥堂峯紫薇峯白道峰天德峰卓劍峰白雲  
峰金牛峰明月峰凝碧峯迎霞峯玉華峰寶柱峯繫  
馬峯白鹿峯

箕山在太室東南二十五里亦名許由山益避禹之

子於箕山之陰卽此

按箕山另有  
部茲不具詳

陽城山在登封縣東後漢荀爽貽李膺書悅山樂水  
家於陽城卽此地也水經注昔禹避商均於陽城唐  
地理志曰陽城地有測影臺周公以土規測景處

轘轅山在登封縣西北二十八里一名嶠嶺十三州  
志曰轘轅道凡十二曲史記禹通轘轅後爲關東漢  
何進所置八關之一也左傳晉欒盈過周王使侯出  
諸轘轅卽此

大熊山在登封縣東四十里唐詩稱交崖山山形陡  
峻惟有東西兩徑東徑自王莽坪緣山脊而上路甚  
險西徑自孤石溝而入溝盡處折而南則大熊之西  
巖也東巖有仙人洞稍南有黃龍潭

倚箔山一名天箔山名勝志曰其形峭峻望如立箔



古今圖書集成  
西北崖下有石鐘乳唐書云貞觀七年採鐘乳於倚  
箔山卽此

石淙山在登封縣東南三十五里峯攢水繞一邑奇  
觀唐則天武氏與羣臣會飲於此其跡尚存

盧巖在太室東唐盧鴻隱處其巖削壁千仞瀑布水  
飛流而下姿態萬狀最爲奇觀東有盧徵君祠前有  
飛泉亭澗中石壁有紋如墨畫水波之狀明袁宏道  
題墨浪石三字

蝌蚪巖名勝志曰嵩山之東有蝌蚪巖嵩高山記曰

漢張芝於此獲蝌蚪古書

虎口巖在太室之奧唐李筌得黃帝陰符本經於此  
赤脚巖在嵩山南麓相傳仙人張赤脚嘗憩息巖下  
錦帶巖在太室南啓母石之左巖高無際中有五色  
石一層望之如束帶然

摘星巖在少室之東壁立如岑樓

摩蒼巖在鉢盂峯最高處有石曰覓心臺文太青命  
焦復亨改書此名

柏廈巖在少室山東巖勢削直其高無際半壁見一

古今圖書集成  
洞門上有古柏覆之如廣廈

東巖昔白龜年至嵩山遙望東巖古木簾幕匝地步至其傍見一人曰吾李白也爲中嶽辟掌牋奏已百年矣因贈龜年書一卷讀之能辨禽獸言語卽此棲靜崖在中峯東南稍下三里許有石巖形如半舫其間地僅丈許上下壁削遊人於崖西穿石竇駕木蛇行以度巖中石隙滴水不絕置器盛之可資棲飲舊志稱爲高登爲更今名

玉黃峽在少室正東峽中多黃石光潤如玉故名

待仙峽在玉黃峽之南山勢奇險此爲更甚兩巖巉峭聳出雲霄峽之將盡處有小坪相傳有唐李拾遺祠明陳文燭記西北有柏洞

鬼谷在告成城北鬼谷子學仙處

潁谷在陽城山之東左傳潁考叔爲潁谷封人卽此逍遙谷在太室南唐潘師正所居太宗幸焉亦名承天谷

紫虛谷在嵩山之陽宋張昇結庵其中

柏谷在少室西北去少林寺五十里西征記曰谷中



古今圖書集成  
無回車地柏林蔭靄窮日幽暗殆弗覩陽景裴濯少  
林寺碑云羣峰合沓深谷逶迤復磴緣雲傍臨鳥道  
其險可想見也隋開皇中詔賜少林地百頃稱柏谷  
屯唐太宗致書少林寺乃稱柏谷塢

萬安山在洛陽縣東南四十里一名大石山漢時名  
石林馬融廣成苑賦云金門石林殷起乎其中是也  
山高二千丈危峯邃谷冠乎洛陽其麓有彭婆塚及  
唐姚崇墓

猴山在鞏縣東南二十里山勢高峻其形如猴晉王

亥隱此

按猴山嵩高  
志作侯山

趙封山在鞏縣南四十里宋種茶此地封之以禁樵  
採故名

虎頭山在鞏縣南門外僅接城垣形類虎故名知縣  
吳三仁改名南極山

青龍山在鞏南四十里其山穹窿在宋太祖陵左故  
名

黑雲山在鞏縣南六十里昔成湯禱雨處傳聞禱畢  
有黑雲起於此山故名

古今圖書集成  
緱山在偃師縣南四十里孤峯突出周靈王太子晉  
昇仙於此按緱山另有部茲不具詳

荆山在閩鄉縣南三十五里黃帝採首山之銅鑄鼎  
於此

按洛陽縣志山川嵩山屬登封縣然與伊闕等山聯  
絡綿亙舊志亦列其名今從之

萬安山 語同府志

按偃師縣志山川萬安山在縣治南五十里  
浮山在縣治南五十里緱氏堡

馬鞍山在縣治南六十里與少室山相接以形名

燄光山在馬鞍山下五峰並列如火燄然故名

香爐山在縣治南六十里當馬鞍少室之門巔岈尖  
峭如博山爐形故名

佛光峪在萬安山下俗傳昔有佛放光於此故名

豢龍巖與緱山近

石室巖在馬鞍山上穹窿如室俗呼爲瓦間堂

滴水巖在佛光峪崖中有泉滴水故名

浮丘洞在東南仙君堡天台道士浮丘公修道之處



古今圖書集成  
柏坡卽緱山之麓有古柏滿坡故名嘉靖戊子歲荒  
居民始取資食日久遂殲

飲鶴池在緱山上今涸

飲馬池在治東南仙居堡昇仙廟西南卽王子晉飲  
馬之池

張公泉在治南緱山堡俗傳宋時有張公每取飲之  
故名

馬跑泉在佛光峪昔唐三藏往洪州歸至此所乘之  
馬跑地得泉今涸

甘露泉在仙君堡南泉水瑩散如飴故名

靈泉在縣治南仙君堡浮丘祠東溝中元致和間泉  
始出澄散可愛若鳧鷖泳者卽死病者飲之卽愈故  
名

落鹿澗在縣治南二十五里子晉射鹿於此從浮丘  
公學道之處

拜馬澗在縣治南三十里子晉乘鶴昇仙棄所乘之  
馬於此鄉人拜之因名

按鞏縣志山川虎頭山在縣南門外 語同府志

古今圖書集成  
青龍山 語同府志

龍尾山在縣西三里宋諸陵聯絡其下至此斷絕尾接河洛故名

趙封山 語同府志

老君山在縣南八十里下有老君洞煉丹井

猴山在縣東南二十里山勢高峻如猴

寒戰山在縣南五十里山峯高插雲霄下有玉仙河雖盛暑亦有寒氣逼人

黑雲山在縣南六十里昔成湯禱雨處傳聞禱雨畢

有黑雲起於此山須臾雨數千里遂名

轅轅山在縣西南七十里其坂十有二曲將去復還故名

五枝嶺在縣西南七十里嵩山至此分五枝一結青龍山一結伏兒山一結汴梁綿亘數千里皆此山發脉也其二枝短小無所結

嵩嶺在縣西南七十里接嵩山

老君洞在趙封堡洞有老子像按鞏縣之山郭璞曰鞏維嶽宗穆天子傳曰河者瀆之宗鞏正在二宗之



古今圖書集成  
間西阜曰夏臺臺西稍南山勢迴環其下石洞四五  
刻有曇雲像一寺名淨土南望少室如雲屏少室雖  
屬登封之少林而外方面壁凝然積翠遠對晴嵐玉  
光靄靄又若爲鞏南供設者由洛水自南而北於此  
朝趨無山遮蔽全體畢現嵩支爲轅轅其山勢將去  
復還漢嘗置關宋有趙城商桑林社漢昭烈寨戰國  
蘇秦代厲故里其東則唐黃巢起兵試刃寺而景毫  
湯亭亦在焉其北爲郭子儀封穴處其東爲亂石山  
出牛鼻五泉北有時磴平整自下而上乃宋代封嶽

故道秦漢以來多封禪漢採公孫卿之言尤屢致意  
於此所謂山下呼萬歲者三然耶否耶北有青龍山  
鬱葱輝映甲於羣山爲宋狀元宰相蔡齊故里山脉  
西北行爲磨臍堆大青堆小青堆峯巒甚秀直抵縣  
城之東其麓曾有青城縣西下爲猴山晉王玄隱於  
此漢相項董二墓將岑彭之墓俱在大抵自南而東  
皆嵩脉自北而西皆邙脉

按密縣志山川浮山在縣東三十里

按山海經水經注半石之山屬

偃師浮戲之山屬密縣嵩高志詳言之今查二縣志皆不載此二山名獨密有浮山或卽浮戲歟然

此山則偃師亦列其名不獨密縣為然也

欽定古今圖書集成方輿彙編山川典

第五十六卷目錄

嵩山部彙考二

考



山川典第五十六卷

嵩山部彙考二

考

按嵩高志形勝太室山海經作泰室西征記曰謂之  
 室者以其下各有石室焉潘岳關中記云嵩高山石  
 室十餘孔有石牀池水可以避世今自中峯而晰之  
 青童在左太白在右潁水界其前洛水繞其後懊來  
 萬羊以為內衛箕山兩熊陽乾陽城以為外衛巋然  
 獨尊矣古云華山如立嵩山如臥觀其渾淪端整如



長城障天殆信然歟

少室一名季室見山海經註在太室之西稍南相去十七里郡國志云少室一名負黍山有負黍城在其南關中記云少室山有十八疊週圍方百里西征記云少室高八百六十丈上方十里郡國圖志云少室其高十六里輿地志云少室從東角上四十里得下定思又上十里得上定思十里中有大石門爲中定思傅太常曰看山如相人先論面背由盟津渡河望之見少室之背如牆壁然若踰轅轅歷少林東去正

從臀下過耳東方由密縣及告成來俱十得其四西方由潁陽來十得其六西南惟汝州城正相對峰巒層疊如千葉舒萼聳出雲表雖以太室之雄偉不得不遜其華秀矣

箕山在太室東南高大四絕其形如箕太史公曰予登箕山其上蓋有許由塚云又名許由山

陽城山在太室東一名車嶺山洧水所出禹避舜之子於陽城國語註云禹居陽城崇高所近

東龍門山雜道書云在嶽廟東北二十里謂之東者



古今圖書集成  
蓋因伊闕龍門在西故相對而言也

三臺山在嶽廟東北二十餘里昔漢武帝東巡過此山見學仙女又盧元明嵩高山記曰山有玉女臺云漢武帝見三仙玉女

陽乾山在少室正南正義曰括地志云潁水源出洛州嵩高縣東南三十里陽乾山漢書晉地道記皆稱潁出陽乾博物志則曰潁出少室由此觀之陽乾爲少室之分支亦已明矣

君子山在登封西北二十五里太室之右麓

萬金山在太室東北去唐莊十里

玉案山在華蓋峰南形衡長如案上多白石

懊來山在太室之南縣東四里

緱山在少室西北屬偃師上有石室飲鶴池乃王子晉乘白鶴處有武則天御製碑

小熊山在太室南四十里下有二洞深不可測山之陰有聚落名曰白栗坪

大熊山在太室東南與小熊山相接其下多鐵山民鼓鑄漢書云陽城有鐵官卽指此

三尖山在太室正南俗名駱駝岡

交崖山唐崔曙有早發交崖山還太室詩

牛山嵩高山記云嵩東脚下有小山名牛山多香樹

石堂山在少室西潁陽鎮北有石室名紫雲洞卽邢

和璞所隱處有神清之洞四字詳希深寄殿丞書

倚箔山在石堂山之西一名天箔山崖下有洞生鐘

乳唐書云潁陽倚箔山有鐘乳

萬安山在倚箔山之西一名大石山又名石林馬融

廣成苑賦云金門石林殷起乎其中是也

玉華山在少室下雷淵有玉華山詩又元好問遊玉

華谷因憩少姨廟壁間見仙人詩

大苦山與倚箔山相近或曰卽太谷山潛確類書載

倚箔山太谷山俱在舊潁陽境寰宇記云大苦山在

登封

半石山在少室之西北屬偃師詳水經注

浮戲山在馬領山之東屬密縣詳山海經

馬領山在陽城山之北詳水經注又李太白題元丹

丘別業北倚馬領連峯嵩丘卽此



古今圖書集成  
九山在太室北詳水經注

覆釜山與緱氏山相近上有子晉祠水經注稱覆釜堆又稱撫父堆

青龍山在太室北屬鞏縣以其在宋太祖陵東故名其尾接洛河者曰龍尾山

寒戰山與玉仙山相近屬鞏縣臨玉仙河其山陡峻經者戰懼因名

玉仙山在太室東北屬鞏縣崖谷險峻中有銀礦萬曆己酉土民盜開後嚴禁始封閉

趙封山在太室東北屬鞏縣宋種茶於此而封固其地因名

侯山屬鞏縣盧元明嵩山記曰漢有王彥者隱於此山景帝累徵不出就而封侯至今指所在爲王彥崖通志云一名王亥山

虎頭山在鞏縣南其西有駱駝嶺兩山並峙亦甚奇異

浮山在少室之北與緱山相近上有浮丘公祠  
風門山在少室之西一嶺南通潁陽北通府店

古今圖書集成  
偃月山在太室東南箕山之左與石羊關相近  
荆山在石羊關外屬禹州嵩之餘也洛陽記齊武帝  
於此采玉

五乳峯在少室之北隈五頂羅列前如鳳張兩翅少  
林寺建其中祖師取名五乳後果有五支

太室中峯卽嵩頂端正而中居四面諸峯環擁上有  
天池玉井下有石室

太室二十四峯樓異有詩

青童峯世傳山上有青衣童子一漢武帝登嵩時捧

書來迎欲問俄失之因名

黃蓋峯在太室東南時有黃雲如蓋

浮丘峯因浮丘公會居此山而得名

三鶴峯昔道士李八百鍊藥於此峰之下常有二白

鶴飛集峯頂

遇聖峯昔漢武遇九嶷山人於此詳王興傳

萬歲峰武帝聞呼萬歲卽此

玉鏡峯峯下時見一鏡浮空光色如玉

獅子峰以狀名



古今圖書集成  
虎頭峯自下望之如虎伸頸故名舊志云李筌得黃帝陰符本經於此今考本傳筌得陰符於虎口巖或曰上爲峯下爲巖

起雲峰峰每出雲土人占雨

鳳凰峯人傳鳳凰曾止於此亦曰鳳凰臺

金壺峯相傳昔老子曾居此以浮提人金壺墨汁而  
得名

華蓋峰舊志云勢覆諸峯爲最高故名華蓋或曰卽  
中峯別名

元龜峰山形如龜且多黑石

臥龍峯峯勢蜿蜒如龍臥狀

會仙峰漢武登嵩見八仙人奕棋於此

子晉峰昔王子晉居此

玉柱峯一峯孤立如柱

老翁峰山上有石儼然如翁高五十丈

玉人峯漢武帝於峯上得玉人爲廟主玉人高五寸  
色甚光潤見嵩高山記

玉女峯峯北石如玉女上有大篆七字人莫能識

金匱峯山形方石如金色一名獨秀峰  
積翠峰峰多碧石且草木獨茂

太白峯居太室西

已上爲太室二十四峯嵩書因盧鴻一銘又添十  
二峯比同少室殊失本來面目依舊志刪之

鷄鳴峯紀異云嵩嶽之東北一峯號鷄鳴五更之初  
便見日出

望都峯紀異云嶽之西北一峯號望都天氣晴朗望  
見洛陽隱如車蓋

右二峯盧鴻勒銘其上見陳晦伯天中記舊志載  
之不敢俱沒也

少室三十六峰樓異有賦

朝嶽峯一名豫章以東望嶽祠有朝拱之狀故稱今  
名

望洛峰登其巔可見洛陽

朝陽峰峰頂高敞日光畢照爾雅云山東爲朝陽  
少陽峯在太陽峰之次朝旭必先及之下有少陽河  
石城峰山石壁立自下望之如城



石笋峰尖直挺出其狀如笋  
檀香峰山有檀樹木紫而香  
丹砂峯石色似之亦產丹砂

鉢盂峰峰頂圓平石表土中如鉢盂之狀建二祖菴  
香爐峰突兀上平形如香爐

連天峰峰勢高望之若與天接

紫霄峰與連天峰相埒

羅漢峰峰形如羅漢狀

七佛峰峰形連結類佛者七又云巖中有銅像七尊

靈隱峰靈境爲羣仙所隱棲之地故曰靈隱

來仙峰山有大洞仙人所止

清涼峯其下有清涼寺

寶勝峯下有尼寺亦名寶勝

瑞應峰峰上曾見神人通體紅色

瓊壁峯山石光潤初日射之其色正赤故名瓊壁

紫蓋峰峰色多紫亭亭如幢蓋狀

翠華峯翠藹華茂亦以形色名

藥堂峯山多藥草美而稱之曰堂亦猶王屋之有藥

古今圖書集成  
櫃峰也

紫薇峰山多紫薇花

白道峰昔有隱士白道猷嘗居此峰上有白道洞高  
邃險絕人跡罕至

帝字峰峰上石文有天然帝字亦稱天德峰義未詳  
卓劍峰山形如劍卓

白雲峰岫中多出白雲四時無間

金牛峰色如金狀如牛

明月峰樓昇賦註云峰中時現圓像如滿月或曰在

太陽峰之西因相對待故名

凝碧峯山多碧石望之蒼翠奪目

迎霞峯在少陽峯之左朝霞海曙必先及之

玉華峯志曰峯上常有金玉氣亦稱玉華山

寶柱峯石成五色屹然如柱

繫馬峯下有拜馬澗或曰拜馬澗在緱氏山

白鹿峯土人常見有白鹿來遊田者竟莫得之

盧巖在太室正東嶽廟之北唐盧鴻隱處有瀑布水  
千仞直下飛洒澗中澗西有小洞可容數人峽中石



生紋浪光潔迥妍與碧潭相映爲山中絕景

科斗巖在太室天門西境僻路險以張芝獲書得名

東巖卽白龜年遇李白處

虎口巖唐李筌得黃帝陰符於此

赤脚巖在嵩山南麓相傳仙人張赤脚嘗憩巖下因名

棄瓢巖初許由隱箕穎間以手掬飲人遺一瓢飲訖掛木上風吹瀝瀝有聲由以爲煩棄之巖下

摘星巖在少室東挺出雲表如岑樓之狀俗稱摘星

### 樓

柏洞巖在少室東巖勢削直半壁一洞古柏覆之

雲母巖其下爲雲母井因井以名巖

石梯巖有級如梯攀梯可至頂其高無際亦名半雲峯

高登巖在中峰南有石室形如半舫遊人穿石窟攀緣蛇行方可入嵩書改爲栖靜今正之

積雪崖太室後經年不見太陽積雪至夏不消

鬼谷高高山記云鬼谷先生於嵩山東南學仙今告

成鎮北有鬼谷即其地

潁谷即陽乾山之東谷潁水所出其側有潁墟相傳為潁考叔故居酈道元水經注所謂潁谷也

逍遙谷在太室南麓唐潘師正隱處一名承天谷

紫虛谷在嵩山之陽宋張昇結菴於此見青箱雜記

馬蹄谷在太室之南麓

萬公谷在太室之西前為永泰寺

玉華谷在少室下即玉華山之谷也

黑石谷在少室北唐岑參有緱山黑石谷詩

柏谷在少室西北述征記云柏林蔭藹窮日幽暗晉宋時名柏谷塢隋稱柏谷屯唐太宗致書少林寺仍稱柏谷塢

老君洞太室南麓金壺峯下有大石方廣十丈餘面開一洞圓潤天然可容二十人石旁有二井探手可飲俗稱鷄卵洞嵩書改為象極洞考金壺峯乃老君撰經處故依舊志正之

顏回洞在太室有古刻顏回洞三字

白道洞在白道峯下仙人白道猷所居人跡罕至



羅漢洞在太室南麓嶽寺後洞深五六里上通山頂  
毛女洞在太室西南深不可測仙人毛女所居

柏洞在柏洞巖上以洞門古柏名土人言昔有道士  
望見仙人往來洞中欣然願往乃身坐畚內令人自

其巔懸縷下之甫入洞忽有怪風吹出道士不敢停  
急投畚上兩耳竟聵矣

文殊洞在少室西深入五丈有石光瑩

達磨洞在五乳峯前即達磨面壁處

雲鐘洞在少室樵人往往聞洞內鐘聲見宋河南志

浮丘洞在少室西北與緱氏山相近相傳浮丘公會  
居於此

紫雲洞在石堂山邢和璞許昌齡隱處

嶠嶺即轅轅山淮南子稱禹治洪水通轅轅山化爲

熊唐皇甫冉有嶠嶺詩

清烟嶺太室之南

望朝嶺太室東南即嶽廟之西嶺一名迎仙嶺

萬羊岡在太室南詳張齊賢事有武后封禪碑

天門峽在太室天門下

古今圖書集成  
大鐵梁峽

小鐵梁峽俱在太室兩崖懸直中間忽斷下瞰無際  
玉皇峽在少室東翠圍峭邃流水潺湲相傳有龍潭  
禱雨輒應亦呼吸通帝座意嵩書改皇爲黃鑿

待仙峽在少室東兩巖巉聳日月蔽虧西北嶽畔一  
洞所謂柏洞也待仙之名因洞而起

龍穴在嵩高山北卽張華所稱龍穴

龍簡穴金元時遣祭中嶽必投金龍玉簡於山上大  
穴吳全節有中嶽投龍簡詩

光明穴在少室東南角深三里餘直上五百尺晝夜  
常明見宋河南志

鐘乳穴在少室東南穴中有鐘乳徑頭大一丈

鶴泣穴鶴淚滴成穴

啓母石在太室萬歲峰之下

搗帛石一名玉女搗衣石在太室頂

達磨影石達磨面壁九年影入於石形狀儼然

三醉石在太室頂八仙壇石形有三醉人欹偃之狀  
定心石在太室上登嵩者千巖萬壑應接不暇至此



居高臨下歷歷分明心自定矣因名

承露石嵩山石室中有石柱形似承露盤中有石脂

滴滴流下食之一合壽與天地相畢

石場在太室南方廣三百步光潔坦平天然一片居

民多負禾就此收穫

石牀關中記云嵩山石室十餘孔有石牀池水可以

避世

石樓在太室上下兩層故名

天門在太室中峯西兩巖對起中豁一門

西天門在少室西峯巒峻絕劃然如闕望之彷彿一

鐵楞牕玲瓏通朗竟不可踐少室四面俱有斷巖號

四天門東南北尚可攀躋獨西天門無路可至

玉女牕在太室石洞幽潔上通日月朗然如牕

織錦臺宋河南志云少室有玉女織錦臺并堂在山

東北堂內石色斑斕煥如紋錦

期仙磴盧鴻嵩山十志之一

滌煩磯 同前

上定思

古今圖書集成  
中定思

下定思少室有二定思山上可憩之處

子晉壘郡國志云少室有子晉壘積有九千年資糧亦見顧野王輿地志

漢果園盧元明嵩山記云嵩山東脚下有衆樹云是漢果園

御砦金宣宗會屯兵於少室因名御砦土人亦稱九頂蓮花砦

三皇砦在少室西南一徑陡絕下臨無際

潘陵尖唐岑參有自潘陵尖還少室詩

謨觴室潛確類書載記事珠云嵩高山下有石室名謨觴內有仙書無數昔仙人方回讀書於內玉女進以飲食

龐塢在太室下僧元珪結廬處

零星塢在少室北見水經注

袁公塢與袁術固相近見水經注

平洛水水發玉女臺下平洛澗南流而與潁水合亦稱勺水



古今圖書集成  
龍淵水導源龍淵東南流注於潁

狂水山海經大苦之山狂水出焉西南流注於伊水  
汜水山海經浮戲之山汜水出焉北流注於河  
來需水山海經半石之山來需水出於其陽而西流  
注於伊水

合水源出半石山北流與劉水合

劉水亦謂之劉澗西北流注於合水

羅水源出太室北詳水經注

綏水出方山綏谿山海經所謂浮戲之山也詳水經

注

蒲池水詳水經注

潁水博物志云天下有八流水出名山潁出少室

洧水漢書地理志云陽城山洧水所出

潁水漢書潁作潁地理志云汝南郡有潁疆縣應劭

註曰潁水出潁川陽城五音篇海云潁水出少室二

說互異又按許氏說文潁水至少室東山入潁通志

云潁水東南過南缺縣潁水入焉二說潁入潁又異

存之備考

休水山海經云少室之山休水出焉北流注於洛  
天門泉在太室天門之側

太乙泉在太室南麓前為崇福宮即宋時諸賢所嘗  
奉祠者引泉為流觴曲水之樂石渠猶存崇福宮在  
唐為太乙觀故泉仍襲其名云

龍贈泉亦在太室南麓其前為會善寺龍以贈晏公  
者自殿右宛轉流至山門而沒止供寺汲不資灌溉  
鳴琴泉在太室內亦曰鳴潏泉按爾雅云水出山石  
間曰潏鳴琴者流水聲合宮商也

逍遙泉在逍遙谷內泉因谷名也

七星泉在嵩陽宮西北泉自山出七孔相連故名

醴泉在登封城南白虎通云醴泉者美泉也

卓錫泉在二祖菴前四泉對待四檜覆之亦稱四井

高隱泉在少室南稱高隱者因唐李拾遺渤得名

洗耳泉源出箕山或曰入潁或曰經汝州城西入汝

馬跑泉在太室東相傳有神馬跑地泉出

飛玉泉在石羊關外平地湧泉如趵突之狀

石柱川在太室東夾水二石如雙關瘦削透露



古今圖書集成  
少陽河源出少陽峯下東南流入於潁

盧店河源出太室之左經盧店東南過告成入於潁  
雙溪河源出太室異源合流過縣東南入於潁  
理粧河源出少室與少姨廟相近少姨嘗臨水理粧  
故名土人亦稱李莊河

江左河源出少室西北流入於伊通志稱姜左嵩書  
載見一斷碣言唐高宗幸少室過此愛其山川秀麗  
顧謂侍臣曰江左風景不過如此因稱江左

五渡谿源出太室東谷自山頂下流疏爲二十八浦

過大澤中平廣多石其水縈紆迴流者五故名其地  
產菖蒲一寸九節服之可以成仙

黃谿源出太室巖中由山左下注谿邊多黃石

金屑谿源出太室之南五里許密樾奇石映帶左右  
谿中時有金屑如麩

者  
玉谿石羊關東岸邊有釣臺巖畔有石室境之最勝

拜馬澗在少室後相傳太子晉乘鶴昇天羣臣拜別  
回拜所乘馬馬亦飛空而去

古今圖書集成  
公路澗在少室山後袁術與曹操相拒處

石淙在太室東南按武后遊石淙詩序云爰有石淙者卽平樂澗也源出於嵩流合於潁奇勝爲箕穎之冠武后久視長安間常來此道暑羣臣侍宴賦詩刻石巖際

雲錦淙見盧鴻嵩山十志

瀑布在盧巖千仞直下如疋練如垂簾飛洒萬狀夏月雨後益奇

九龍潭在太室東巖之巔衆水咸歸爲一大峽峽作

九壘每壘結爲一潭遙相灌輸水色洞黑其深無際封禪壇有石記戒人遊龍潭者勿語笑以黷神龍龍怒將有雷恐

金碧潭在太室下見盧鴻嵩山十志

車箱潭卽平樂澗澗長數里石勢盤錯水流喧激忽至此兩崖壁立水深不流狀如車箱

白龍潭在太室東土人曾見有白龍自潭中飛昇今潭上有白龍王廟

古蹟負黍城在少室南中有少姨廟見含元齋集水



古今圖書集成  
經注負黍在陽城西北二十七里世謂之黃城二說互異史記鄭伐韓敗韓兵於負黍漢書云陽城有負黍聚

訾城在太室北見水經注

登封城在太室南麓漢武帝登中嶽聞呼萬歲者三詔以山下戶三百爲之奉邑命曰密高靈帝改崇高爲嵩高後周爲嵩陽隋文帝六年改嵩陽縣爲武林縣十八年又改武林縣爲輪氏縣唐高祖武德四年以陽城嵩高陽翟置嵩州又析三縣地置康城十七

年省嵩陽入陽城高宗永淳元年營奉天宮分陽城緱氏復置嵩陽縣萬歲登封元年將封嵩山更名嵩陽爲登封縣陽城爲告成縣宋省陽城入登封明景泰間拓大其城萬曆辛亥知縣傅梅重修

告成城在太室東北三十里古陽城縣今廢

潁陽城在少室西南古夏輪國漢置縣潛確類書稱陽城爲潁陽以其在潁水之陽也漢書所稱潁陽與水經注潁陽不知何在唐書地理志云載初元年析河南伊闕嵩陽置武林縣開元十五年更名武林曰

古今圖書集成  
潁陽括地志云潁水源出嵩高縣東南二十里陽乾山考其里道正今之潁陽鎮也時代已遠名稱互異遂無定指矣

延壽城卽緱氏城古滑國漢置縣今廢

孤竹城在太室西南三十里潁水穿流城北

鞏縣城在太室之東北

轅轅關在太室少室之間緱氏縣東南左傳晉欒盈過周王使侯出諸轅轅獻帝春秋曰車駕出洛陽自轅轅而東楊奉韓暹引車追之卽此管子地圖篇云

轅轅之險房元齡注云謂路形若轅而又轅曲緱氏東南轅轅道是也

石羊關在太室之東南郡志云關口陡峻道路險隘僅容一車元至正六年設或曰關崖有石如羊故名鄂坂關舊志云在告成晉地理志云城陽有鄂坂關或曰卽嶓嶺

大谷故關在潁陽西北與倚箔山近見唐書地理志陽城關西魏置孝昌十二年陞陽城縣爲郡復分陽城地爲康城縣置陽城關



古今圖書集成  
袁術固在少室山後屬偃師袁公路與曹操相拒置此四周絕澗可容萬人澗亦名公路澗

封禪壇在太室中峯唐武后登封時建今廢

八仙壇在太室山頂武帝見八仙圍碁因建今廢

琉璃壇在會善寺西唐高僧趙州從諗傳云少往嵩山琉璃壇納戒卽此有元僧溥光石刻茶榜字徑二寸頗具風度

中嶽廟在黃蓋峯下古柏森蔚爲一方寺觀之冠唐韋行儉碑云元魏徙廟於嶽之東南似元魏以前廟

在別所宋盧多遜碑亦未詳廟南有呂常造作石門則漢元初也崇禎辛巳嶽廟災大殿兩廡俱燼

周公廟在告成鎮測景臺後弘治間知府陳宣建

啓母廟在太室山下漢武帝祀嵩見啓母石遂令建啓母廟南有石闕亦稱開母祠見嵩高山記唐高宗幸嵩山勅令重修命崔融作碑銘今廢

迎仙廟在嶽廟西望朝嶺上

三官廟在登封縣西關

裴商廟在嶽來山陰

扁鵲廟在劉碑村東有大學士高拱碑

少姨廟在少室山下楊炯碑銘云少姨廟者故老相傳啓母塗山氏之妹也

許由廟在箕山上

仙官廟在中嶽頂昔唐明皇封太山回問司馬承禎曰五嶽何神主之對曰嶽者山之巨鎮而能出雲降雨爲國之望然靈仙所隱亦有仙官主之於是詔於五嶽山頂各立仙官廟今亡

元帝廟在太室頂元龜峯之上有天池玉井

九龍廟在嵩山東九龍潭上

昇仙太子廟在緱氏山上以祀王子晉者有武后御製碑文

純孝伯廟在潁源上以祀潁考叔者金元好問有詩崇福宮在太室萬歲峯下漢武帝登山聞呼萬歲建此唐改名太乙觀宋更名崇福宮設提舉管勾官命朝臣領之爲祝釐之所有真宗元神本命御容三殿宮後有奕棋携菹泛觴三亭

嵩陽宮在嵩山麓魏孝文帝剏造名嵩陽寺唐改爲



古今圖書集成  
嵩陽觀元宗天寶命道士孫大冲鍊丹於此有聖德  
感應碑中唐改名天封觀宋名天封宮元名嵩陽宮  
有三柏大者七人圍次六人圍次五人圍相傳漢武  
帝封爲三將軍

奉天宮與嵩陽宮相鄰在逍遙谷之右唐高宗建按  
王適碑云調露二年命以嵩陽觀爲奉天宮稍異  
三陽宮在石淙水上唐武后建久視元年同太子羣  
臣如三陽宮追暑磨崖刻詩張說諫疏稱御苑東西  
二十里可謂大矣

太乙觀唐高宗建

白鶴觀在太室頂相傳浮丘公接王子晉卽此

隆唐觀在逍遙谷中按王適碑文唐高宗調露元年  
同武后如嵩山幸潘師正之居勅有司卽其廬建隆  
唐觀後避元宗諱稱崇唐觀

精思觀高宗旣爲師正建隆唐觀又於嶺上別立精  
思院以處之孟浩然有精思觀詩院亦稱觀

紫虛觀在紫虛谷賀蘭棲真所居

洞清觀見唐許渾贈蕭鍊師詩序

古今圖書集成  
土德觀在中嶽廟西元天曆二年建明成化重修  
大法王寺在嵩山南麓漢永平十四年建乃佛寺之  
最先者魏名護國寺晉名法華寺隋名舍利寺唐太  
宗名功德寺元宗名御容寺代宗更名文殊師利廣  
德法王寺五代間分爲五院宋初五院合居仁宗賜  
名嵩山大法王寺背負高岑俯瞰二熊諸山排列如  
拱真形勝之區

嵩嶽寺在法王寺西元魏二年使馮亮建閒居寺開  
皇改題嵩嶽寺武后貯送鎮國金佛像詳李邕碑

會善寺在嵩嶽寺西本北魏孝文帝離宮魏亡爲澄  
覺禪師精舍至隋開皇中賜名會善寺詳王著碑乃  
嶽神受戒元珪禪師處有泉水流至寺門而隱相傳  
以爲龍化老人聽經而報之水亦異

少林寺在少室北五乳峯前後魏孝文太和中跋陀  
自西域來詔有司於此建寺處之達磨面壁傳衣鉢  
慧可世派相沿稱祖庭隋唐賜柏谷田碑碣甚多以  
唐裴濯爲最

峻極寺上院在太室中峰頂詳金釋道琇碑今廢



峻極寺下院在登封城西殘碣言張侍郎捨宅未詳  
永泰寺在太室右後魏正光二年孝明帝之妹出家  
爲尼勅爲置此本名明練寺神龍二年追薦故永泰  
公主改名永泰寺詳釋靖彰碑  
盧巖寺在太室左麓爲盧鴻故居或曰後捨宅爲寺  
下盧巖寺在盧巖寺東南三里

龍潭寺在盧巖之北爲龍潭下寺倚山環水規模壯  
麗自寺右轉折而上至九龍潭山圍中忽開平地形  
勢尤佳相傳武后曾建離宮於此後爲上龍潭寺今

廢

清涼寺在少室清涼峰之下

道場寺馮亮爲宣武造閒居佛寺林泉旣奇營製又  
美曲盡山居之妙亮時至京師延昌二年冬遇疾還  
居嵩高道場寺見北史

石窟寺魏書永熙二年齊獻武王自晉陽出討爾朱  
兆大破之於赤洪嶺車駕幸嵩高石窟靈巖寺  
靈巖寺詳見前按唐人有題石窟寺詩又有宿靈巖  
寺詩蓋二寺也

天中寺唐人有天中寺尋復禮上人詩

封禪寺五代時高僧貞峻棲此學新章律疏

面壁菴亦稱初祖菴在少林寺西北三里許卽達磨九年面壁處影石猶存菴背倚五峯前臨震澗松偃蓋柏參天爲山中勝境有蔡卞署書黃庭堅頌俱鐫碑寺西閣下有石刻面壁之菴四大字則蔡京書也二祖菴在少林寺南鉢盂峯之巔乃惠可禪棲地吏隱菴宋國博龐元常隱嵩山所築司馬溫公有詩今廢

控鶴菴在嵩山之巔宋劉居中居此二十年詳本傳測景臺在告成鎮卽古陽城地也有石方可仞餘聳立盈丈上植石表八尺刻其南曰周公測景臺按唐地理志云陽城有測景臺開元十一年詔太史監南宮說刻石表焉卽今表是也杜氏通典云儀鳳四年五月命太常博士姚元於陽城測景臺依古法立八尺表夏至日中測景尺有五寸正與古法同明嘉靖九年巡按河南何天衢言登封舊有測景觀星二臺周公遺跡也土圭表漏俱存乞勅委官考正制度刻



古今圖書集成  
之史冊從之

觀星臺在測景臺北高五丈闊二丈臺背面正中處  
凹入數尺上下懸直北有平石三十六方面爲二溜  
漕接連平鋪至盡頭合通其製難曉按梁祖暉時造  
八尺銅表其下與圭相連圭上爲溝置水以取平正  
揆測日晷求其盈縮又漢趙爽作周髀筭經與此亦  
同

登仙臺在少室峰下漢武帝所築見戴延之西征記  
玉女臺漢武帝於嵩高山見三仙玉女因以名臺見

盧元明嵩高山記

集仙臺在太室山下漢武帝築見通志

思仙臺在少室山下淮南王築見玉海

甘露臺在少林寺天竺僧跋陀繡經處

鳳凰臺在嶽寺之右唐高宗時有鳳凰飛集於此

逍遙臺在嶽寺後

覓心臺在鉢盂峯二祖菴之前南倚峭壁下臨無際  
乃惠可覓心處也舊稱練魔臺

望母臺洧水之南有鄭莊公望母臺蓋克段置武姜

古今圖書集成  
於城頴之後故築臺以望母後感考叔之言爲母子  
如初見水經注

倒景臺在太室南麓天門之下盧鴻十志之一  
峻極殿中嶽廟正殿九間宋元舊制弘麗非常萬曆  
壬子春知縣傅梅重修殿額爲宋人書用顏魯公麻  
姑仙壇體

鳳陽殿北魏離宮殿名後改爲閒居寺七佛殿  
八極殿北魏離宮殿名後改爲西方禪院  
黃籙殿在嶽廟之後今貯道藏經函於此

黃中樓中嶽廟之南門也門臺高踰三丈上建樓五  
間修簷曲檻碧瓦覆之頗稱偉麗嘉靖戊午知縣劉  
汝登建工部尚書朱公衡改名天中閣

逍遙樓在閒居寺本魏之離宮也見李北海碑

嵩陽樓孟浩然有陪張丞相登嵩陽樓詩

毗盧閣一名千佛閣在少林寺後萬曆戊子年建  
藏經閣在少林寺閣後有秦槐文潞公作詩詠之

嵩陽書院在太室南舊名太室書院五代周時建宋  
至道賜太室書院藏九經是年河南府守臣上言甘



古今圖書集成  
露降于書院講堂景祐二年重修更今名賜田一項  
金元廢明嘉靖間卽嵩陽宮故址建二程祠仍稱嵩  
陽書院

潁谷書院在潁陽城西北舊宣聖廟故址未詳創自  
何時至元五年重建先師殿旁祠潁考叔登封尹閻  
詢具始末請之河南郡使者聞於朝賜額潁谷書院  
見元禮部尚書王沂碑

萬歲亭漢武帝元封元年建亦見西征記今廢  
負黍亭在陽城縣西南二十五里見括地志

聖水亭在嵩高山後

芝和亭在太乙泉之左

甘泉亭在崇福宮後

立雪亭在少林寺卽二祖神光立候達磨之所傳稱

雪深過膝不動

景雲亭在嵩山下

觀瀾亭在石淙

飛泉亭在盧巖寺後瀑布之前

生賢亭在嶽廟峻極門內壁畫申甫像今亭尚存像

古今圖書集成  
剝落矣

御香亭在嶽廟峻極殿東

御帛亭在峻極殿西二亭爲朝廷遣祭置香帛之所  
樾館盧鴻嵩山十志之一

弭節堂在嶽廟西便門外稍北爲使者致祭齋宿之  
所洪武中建萬曆戊申傅梅重修

廓然堂在少林寺方丈東前巡撫河南都御史蔡公  
汝楠建今廢

草堂在太室下盧鴻建見十志

洞元室在太室之下亦盧徵君所建

枕煙庭

羃翠庭二庭俱盧徵君建

中嶽廟石闕在廟之正南神道漢安帝元初五年陽  
城長呂常造闕左有八分書銘字雖剝落尚半有可  
識

啓母廟石闕在啓母石正南漢安帝延光二年潁川  
守朱寵造

少室石闕在少室之東邢家鋪西銘盡剝不可辨嵩



山絕無漢人碑碣三石闕其僅見

李拾遺祠在少室山下以祀李渤者

盧徵君祠在盧巖東嶺

田遊巖宅在逍遙谷唐高宗營建奉天宮遊巖舊宅

直宮左詔勿毀榜其門曰隱士田遊巖宅

仙遊門

尋真門在逍遙谷高宗為潘師正立精思院又勅於

谷口特開一門曰仙遊門又於苑北面置尋真門

獨木橋在太室峽中土人伐山得巨柏棄置澗上樵

牧往來取徑因名

周昭王陵在少室山見一統志

商均墓在登封縣南見郡志

潁考叔墓在太室西

許由墓在箕山之巔太史公曰予登箕山其上蓋有

許由塚云

巢父墓與箕山相近

周聖墓在少林寺見舊志

京兆王墓在嵩山上按魏書王景穆皇帝孫也諱太

古今圖書集成  
興除守衛尉卿因患病佛前乞願若病痊卽捨王爵  
入道未幾愈遂請爲沙門更名僧懿居嵩山終葬山  
頂

魏裴植墓植歷官度支尚書表請解官隱嵩山世宗  
不許尋以怨望被譖誅死遺令子弟命盡之後剪落  
鬚髮被以法服以沙門禮葬於嵩高之陰

蕭贊壽陽公主墓贊本蕭寶卷遺腹子寶卷滅後蕭  
衍納贊母吳氏宮中生贊以爲己子封豫章王及長  
其母告之以實贊遂奔魏爲寶卷追服三年喪歷官

太尉尚莊帝妹壽陽長公主後爾朱變作公主以持  
節遇害贊棄官爲沙門尋卒普泰末命以王禮與公  
主合葬嵩山

漢張伯雅墓在馬領山之東碑云德字伯雅河南密  
人也詳水經注

晉潘岳父子墓俱在太室北

唐盧殷墓殷登封縣尉卒葬嵩山之下韓文公爲作  
墓誌銘

五代漢高祖睿陵五代史云在告成一統志云在測



古今圖書集成  
景臺之左

宋太祖父昭武皇帝末安陵

宋太祖末昌陵

宋太宗末熙陵

宋真宗末定陵

宋仁宗末昭陵

宋英宗末厚陵

宋神宗末裕陵

宋哲宗永泰陵已上八陵俱在太室之北麓鞏縣之

西南

宋郢國張公墓在登封縣見琬琰集

宋趙普墓在太室北麓鞏縣西南普宋名相

宋曹彬墓在太室北麓鞏縣西南彬宋名將見一統

志

蓮花池宋陵寢所在種蓮於此

天池在太室中峰巔其水甘冽冬夏不涸庾開府溫

湯碑曰嵩山三仙之館不孤擅於天池卽指此

洗耳池巢父洗耳處曹子建贊曰池主是讓以水爲

濁

京兆王池在大室頂魏京兆王居嵩山時所鑿  
飲鶴池在子晉峯上王子晉飲鶴處或曰在緱山  
雙龍井在逍遙谷老君洞側

地產玉膏山海經云少室之山其上多玉郭璞註云  
北山巔有白玉膏服之卽得仙道世人不能上也

玉漿生嵩山北大穴一名玉液一名瓊漿

白石英石之似玉而有光澤者六稜如削大者徑二  
三寸小者如指長短不一輿地志云少室崖頭下石

室中有水多白石英本草經云久服輕身延年

雲母嵩高山記云少室山有雲母井出雲母荆南志

云取雲母者候雲頭出處於下掘之無不大獲

石髓生嵩山北大穴中

石脂陶弘景云黃石脂生嵩山色如鶯雛黑石脂生  
潁川陽城吳普曰五色石脂一名五色符黃符生嵩  
山白符赤符俱生少室

石鍾乳名醫別錄云石鍾乳生少室山谷本草註云  
凡乳生於深洞幽穴皆龍蛇潛伏石乳者其山洞純



石以石津相滋陰陽交備蟬翼絞成其性溫  
石蜜芝葛洪曰石蜜芝生少室石戶中有深谷不可  
過但望見石蜜從石戶上入石偃蓋中良久輒有一  
滴得服一升長生不老

石膽玉洞要訣云石膽陽石也出嵩嶽稟靈石異氣  
形如瑟瑟其性流通精感入石能化五金變化無窮  
石流赤一名石流丹一名石流芝按抱朴子云石流  
丹者石之赤精亦石流黃之類也浸溢於涯岸之間  
其濡濕者可丸服堅結者可散服五嶽皆有而箕山

爲多許由巢父服之卽石流芝是矣

石桂英神仙傳曰許由巢父箕山得丹石桂英今在  
中嶽抱朴子曰石桂英芝名生巖穴中似桂樹而實  
石也葛洪云石桂芝有枝條高尺許光明而味辛

右二芝各引巢許且異名同色豈一物邪

丹砂少室有丹砂峯相傳產丹砂

封石陶弘景云封石生常山及少室主治消渴熱中  
石麪少室山洞中有石麪遇大饑百姓作餅而食之  
本草綱目云石麪益氣調中

古今圖書集成  
鐵山海經云少室之山其下多鐵今少室不見有鐵而箕山之南馬峪有之土人從事鑪冶頗享其利水碧山海經曰耿山無草木多水碧注水玉類陽乾山一名耿山

自然明燭仙經云嵩高山東南大巖下石孔入五六里太室中有自然明燭與日月無異

帝休按山海經云少室之山有木焉名帝休服者不怒

栳山海經云太室之山其上有木焉名曰栳木服者

不妬

貝多雜道書云漢世有道士從外國將貝多子來於嵩高西脚下種之有四樹與衆木異一年三花白色皆美西陽雜俎云貝多出摩伽陀國長六七丈經冬不凋此樹有三種西域經書用此三種皮葉寫之嵩山記稱嵩高寺中有思惟樹卽貝多也釋氏有貝多樹下思惟經

連理木晉書云晉元帝建武元年閏月己丑木連理生嵩山白虎通曰德至草木朱草生木連理焦氏曰



連理麟鳳不常有也不常有故志之

松王安石字說曰松柏爲羣木之長松從公猶公也  
柏從白猶伯也嵩高山記云嵩嶽有大松或百歲千  
歲其精變爲青牛或爲伏龜採食其實得長生  
柏魏子才六書精蘊云萬木皆向陽而柏獨西指蓋  
陰木而有貞德者故字從白白西方也嵩陽宮前有  
古柏三株大者七人合抱量之得三丈相傳漢武帝  
封爲三將軍又抱朴子云大谷倒生之柏皆與天齊  
其長與地等其久

檀呂氏春秋箕山之東有甘檀莊子檀梨橘柚其味  
相反而皆可於口一名山檀俗作查誤

亢木葉狀如樗而赤實詳山海經

榭一名金鷄樹見潛確類書按唐書武后旣封太室  
登封壇南有榭樹於其杪置金鷄樹

槐少林寺藏經閣後有大槐一株相傳秦時所植宋  
文潞公詩五品封槐今尚在周禮外朝之法面三槐  
三公位焉吳澄註云槐之言懷也懷來人於此也王  
安石釋云槐黃中懷其美故三公位之元命包云槐

古今圖書集成  
之言歸也古者聽訟其下使情歸實也

楊爾雅曰楊蒲柳有黃白青赤四種白楊葉圓青楊葉長赤楊霜降則葉赤材理亦赤黃楊木性堅緻難長嵩山所產惟青楊白楊而已古詩云白楊多悲風蕭蕭愁殺人焦氏曰槐楊桃李皆習見之物習而不察故志之

李素問云李味酸屬肝東方之果故字從木從子韋述西京記云東都嘉慶坊有美李故稱乾李爲嘉慶化書李接桃而木強者其實毛梅接杏而木強者其

實甘此明造化之權有以知巧而移矣

桐爾雅曰榮桐木華而不實故曰榮桐木賈思勰曰華而不實曰白桐實而青皮者曰梧桐青白之外復有岡桐卽油桐埤雅云白桐無子材中琴瑟岡桐子大有油嵩山惟無岡桐耳論衡曰楓桐速長故其皮肌不能堅也大器晚成豈不信哉

柘陸佃埤雅云柘宜山石柞宜山阜楮宜澗谷柳宜下田竹宜高平之地崔豹古今註曰柞實曰橡棘實曰棘桑實曰葢柘實曰佳蠶書曰柘葉飼蠶其絲作



古今圖書集成  
琴瑟絃音韻響亮

椒爾雅曰椒檓醜棗桃李醜核醜屬也言桃李屬皆內核椒檓屬皆外棗也嵩山山岡徧有土人利之杏陸佃埤雅云梅入北方變爲杏猶橘踰淮而北爲枳也嵩高山記云嵩山東北有牛山其中多杏自中國喪亂百姓饑饉皆資此爲命

榆字說曰榆瀋滑故謂之兪莖白者爲枌本草經云榆皮生潁川山谷

楮本草經曰楮實生少室山今所在皆有詩疏云構

卽楮也雜俎云葉有瓣曰楮無曰構

栗呂氏春秋伊尹曰果之美者箕山之栗國語云婦摯不過棗栗以告虔也棗取早敬栗取恂慄相法曰白如截肪黃如烝栗今黃玉亦謂栗玉

桂異物志云桂之灌生必粹其族柯葉不渝冬夏長綠在乎嵩嶽今山中無桂惟少林毗盧閣一株

柿酉陽雜俎曰柿樹有七德一壽二多陰三無鳥窠四無蟲五霜葉可玩六嘉食七落葉肥大

棗嵩山諸果與五穀並多者柿之外棗與胡桃陸佃

古今圖書集成  
埤雅云大曰棗小曰棘棘酸棗也棗性高古重束棘性低古并束皆有刺鍼會意也梁武帝以棗投蕭琛琛取栗擲上上動色曰豈有說邪琛曰陛下投臣以赤心臣安敢不報以戰栗  
胡桃一名羌桃一名核桃外有青皮肉包之其形如桃以核傳嵩山處處有之

橡唐風集於苞栩秦風山有苞櫟陸璣註云卽柞櫟也秦人謂之櫟徐人謂之杼或謂之栩其子曰皂斗其殼煮汁可染皂嵩山甚多土人採其實用水浸七

晝夜去澀性製作粉膏亦可口擊虞拾橡實以爲食杜甫採橡栗以自給卽此

椿葉香其新芽可爲菹嵩高山谷生者尤美香者曰椿臭者曰樗宋人作樗其氣薰也董子曰木名三時椿从春楸从秋榎从夏

桃其性早花而易植結子又繁故字從木兆十億曰兆言其多也馬峪植最良

檜柏葉松身者檜也其葉尖硬亦謂之栝二祖菴有四井四檜覆之



梓陸佃埤雅云梓爲木王故書以梓材名篇禮以梓人名匠羅願爾雅翼云居室有此木則餘材皆不震五雜俎云梓也櫃也椅也楸也豫章也一木而數名者也蓮也荷也芙蓉也菡萏也芙蕖也一花而數名者也

竹許氏說文云冬生草也故字從倒草河圖云太室之上大竹堪爲甌器今山中絕無竹惟潁陽鎮有之近亦殘

葦毛萇詩疏云葦之初生曰葭未秀曰蘆長成曰葦魏都賦蒹葭贊言蒹葭蒼蒼然有力也贊音鉉爾雅曰葦醜芴言其華皆有芴秀風吹揚如雪聚於地如絮也葦可緯爲薄席士人利之

棠梨爾雅云杜甘棠也嵩山徧有春月山民採備荒楊慎丹鉛錄言尹伯奇梔花以濟饑註梔花卽山梨臘梅黃檗禪師云不是一番寒徹骨怎得梅花撲鼻香以罄口者爲貴少林寺有一株圓瓣大朶其香異常山谷謂京洛間有一種香氣如梅類女工撚蠟所成梅譜蠟梅色酷似蜜脾

冬青一名女貞負霜葱翠振柯陵風嵩土霜降木脫  
惟此木與松柏不凋耳

嘉榮草赤葉赤華華而不實見山海經

牛傷草葉狀如榆方莖而蒼傷其根蒼文見山海經  
壽榮草潛確類書載典術云壽草出少室金山丘下  
服之令人不老取葉服之可通百神

合蒂迎輦花生崧山塢中香氣芬馥或惹襟袖移日  
不散洛陽使進煬帝令表同春館

蓄草山海經云太室之山其上有草焉名曰蓄草服

之不昧

南燭草太元先生氣經云木中之玉名曰南燭草每  
叢七十二莖每莖二十四枝每枝五葉以應七十二  
候五行二十四氣也少室山有之

芝嵩高山記云嵩山靈藪有神芝仙藥別錄云黃芝  
生嵩山宋建中靖國元年少林寺產靈芝大小十二  
本守臣繪圖奏聞取入內府後將芝圖摹刻石碑今  
在寺中十二芝名曰抱石黃曰小紫團曰金黃曰覆  
頭黃曰黑團曰印子黃曰鵝黃曰小霞紅曰僧笠紫



古今圖書集成  
日鴨脚黃曰花葉紫曰大紫團

蘭名有數種蘭草澤蘭生水旁者山蘭卽蘭草生山谷者蘭花亦生山谷與二蘭迥別王龍友辯之甚悉陳止齋有盜蘭說方虛谷有訂蘭說黃山谷謂一榦一花爲蘭一榦數花爲蕙焦氏曰余宦閩閱蘭甚多花開四季不同其紫榦玉榦與嵩無異未見有一榦一花者豈皆蕙歟嵩蘭生山之陰移置家中多不花昔人以之比隱士故嵩蘭不讓閩蘭之香而閩蘭不及嵩蘭之品也

萱草萱本作諼諼忘也詩曰焉得諼草言樹之背吳人謂之療愁董子云欲忘人之憂則贈之丹棘周處風土記婦人懷妊佩其花則生男又名宜男嵇康養生論合歡蠲忿萱草忘憂嵩高山谷最多土人採其花蓄之作葅

菊陸佃埤雅云菊本作鞠鞠窮也月令九月菊有黃華華事至此而窮盡故謂之鞠節處處有之不獨嵩也志之以備博物

甘菊菊之品凡百種宋人劉蒙范至能史正志皆有

古今圖書集成  
菊譜不能盡收也惟入藥須用單葉味甘者菊譜所載鄧州黃鄧州白是矣嵩高山谷最多花可入藥葉可作蔬不讓南陽菊潭也

玫瑰花色深紫而香烈擣去汁同梅及糖爲果餅餡甚美南都市中蜜漬者亦佳雜俎曰洛中醫花木者言嵩山深處有碧色玫瑰

夜合花白四垂卽本草所謂百合此物花葉根皆四向故曰強瞿凡物旁生謂之瞿義出韓詩外傳嵩山唐莊甚多花紅帶黃上有黑斑點者本草所謂巷丹

不堪食但可供園囿玩賞

杜鵑一名山石榴俗名映山紅土人但知俗名故表出之

海棠惟紫錦色者爲正餘棠梨耳李德裕色木記云凡花木名海者皆海外來今嵩有之誰植之耶

木槿花朝開暮落故名日及曰槿曰舜猶僅榮一瞬之義爾雅曰檄木槿郭璞註云別二名也或云白曰檄赤曰欒詩顏如舜華卽此焦氏曰人生一瞬耳志木槿示倣也



古今圖書集成  
玉蘭卽辛夷之白花者花殘以麪裹煑食之亦酥煑牡丹之意嵩山少林一株今亡矣

著本草經曰著生少室山谷其莖爲筮以問吉凶故聖人謂之神物白虎通云著之爲言耆也老人歷年多更事久故能盡知也褚先生曰著滿百莖者其下必有神龜守之其上必有青雲覆之易曰幽贊于神明而生著

菖蒲中嶽石上一寸九節詳王興傳

黃精陶弘景名爲仙人餘糧別錄云今南北皆有之以嵩山者爲佳博物志云太陽之草名黃精餌之可以長生

薯蕷本草經云薯蕷一名山芋益氣力長肌肉久服耳目聰明身輕不飢延年生嵩高山谷後避唐代宗諱改爲薯藥又避宋英宗諱改爲山藥嵩民有從嵌石中掘得者形如蟠蛇極難得

何首烏神農本草無名自宋開寶時始入方書圖經曰在處有之以西洛嵩山爲勝此藥本名交藤因何氏服而首烏故得名焉唐李翱有何首烏傳其效有

五壯血氣黑髭髮悅顏色健筋骨益精髓

天門冬抱朴子云在東嶽名淫羊藿在西嶽名管松  
在南嶽名百部在北嶽名無不愈在中嶽則名天門  
冬茲惟中嶽之名通行古今者亦以見物土之相宜  
也

朮按六書本義朮字篆文象其根榦枝葉之形圖經  
曰今處處有之以嵩山者爲佳蓋朮得土氣其益在  
脾中嶽故土位也

葵爾雅翼云葵者揆也葵葉傾日不使照其根乃智

以揆之也本草云生少室山

芍藥本草經云生中嶽川谷及丘陵

桔梗本草經云生嵩高山谷

赤箭陶弘景云亦是芝類其莖如箭籜赤色本草經  
云生少室

防葵唐蘇恭云根葉如葵子根香氣似防風故名本  
草經云生嵩高少室

天雄本草經云生少室山谷抱朴子云康風子丹法  
用羊烏鶴卵雀血合少室天雄汁和丹內鵠卵中漆



古今圖書集成  
之內雲母水中百日化爲赤水服一合輒益壽十歲服一升千歲也

草石蠶本草陳藏器云生嵩山石上

白頭翁一名野丈人一名奈何草本草云生嵩山山谷及田野

莧埤雅曰莧有紅莧白莧紫莧爾雅曰蕒赤莧卽今紅莧是也莖葉皆高大而見傳曰青泥殺鼈得莧復生今人食鼈忌莧以此

繁埤雅曰蒿青而高繁白而繁爾雅曰繁皤蒿白蒿

也所在有之可以爲菹嵩人呼爲米蒿

毛女菜野菜也春月采食嵩山有毛女仙毛女洞又有毛女菜亦異

芥其子如粟或曰草謂之芥君之視臣如草芥傳曰磁石引鐵琥珀拾芥謂此埤雅曰芥辛菜也今人望梅生津食芥墮淚此五液之自外至也慕而涎垂愧而汗發此五液之自內至也

菘埤雅云松性凌冬晚凋有松之操故曰菘今謂之白菜土人冬月入窖內擁以暖糞不使見風霜謂之

古今圖書集成  
黃芽范詩撥雪挑來蹋地菘

蕓臺卽油菜也其子可榨油種自胡來塞外有地名蕓臺故云土人亦謂之臺菜

萊菔以根名古謂之蘆菔後世誤謂蘿蔔或曰蘿蔔自胡地來氣味微似萊菔因而同稱陸佃云萊菔能制麪毒言來麥所服會意也蘿蔔土人亦稱胡蘿蔔藿爾雅曰藿山韭嵩澗谷多有視人家所種略別埤雅曰薤之美在白韭之美在黃皆惡其末之盛也齊民要術曰韭高二寸便剪諺曰觸露不搯葵日中不

剪韭

匏埤雅曰長而瘦曰瓠短頸大腹曰匏傳曰匏謂之瓠誤矣五雜俎曰匏一名壺盧嫩而甘亦可食老而苦惟用以渡水盛水鷓冠子曰賤生於無所用中流失舡一壺千金

甜瓜瓜類不同其用有二供果者爲果瓜甜瓜西瓜是也供菜者爲菜瓜胡瓜南瓜是也西瓜自宋洪皓始攜歸中國禮記天子削瓜及瓜祭嘗時惟有甜瓜耳本草圖經曰瓜蒂卽甜瓜蒂生嵩高平澤舊說瓜



有青白二種白瓜卽冬瓜可見古人瓜無多種或曰黃瓜卽胡瓜俗以王瓜爲黃瓜誤矣王瓜土瓜也南瓜出南番其色或青或白經霜則黃絲瓜一名天羅瓜自南方來亦曰蠻瓜

蒿爾雅曰蒿山蒜嵩人呼爲澤蒜生嵩山澤中視家蒜微小耳家蒜謂之大蒜種自西域來

女蘿一名唐一名蒙一名菟絲爾雅曰唐蒙女蘿女蘿菟絲郭璞註別四名也又名玉女淮南子曰菟絲無根而生蛇無足而行魚無耳而聽蟬無口而鳴皆

自然者也

牡丹花品中以牡丹爲花王芍藥爲花相歐陽公花譜所載三十餘種皆人植之耳非地產也石堂山之西有牡丹溝

月季一名常春一名勝春一名瘦容一名鬪雪紅俗呼紅者爲月月紅粉者爲月月粉嵩山山谷甚多但不如家中所植嬌好耳

秋海棠生少室山澗玉皇峽甚多秋月花盛開點染水湄滿澗幽媚

紫薇少室有紫薇峯中多紫薇五雜組云木蘭去皮而不死紫薇搔其皮則樹皆搖動

陵霄一名紫葳詩所謂茗之華是也爾雅云茗一名陵茗郭璞註云陵時又名陵霄少林寺山僧乃誤指爲貝多耳

金蓮在法王寺殿前相傳神光說法地湧金蓮土人往往移去卽枯葉似荜花秋開考金蓮乃水產今在山故相與異之

麇晉五行志云咸寧五年九月甲午麒麟見於陽城

埤雅曰麇從吝有愛吝之意牡麒麟牝麇陰主吝嗇爾雅云麟麇身牛尾一角或曰麟肉角鳳肉味皆示有武而不用傳云麒麟似麟而無角

駮漢書武帝詔曰朕用事於中嶽獲駮鹿山海經云駮狀如馬白身黑尾一角虎牙聲如鼓能食豹可以禦兵

麇爾雅云麇大麇牛尾一角說文云麇麇屬大鹿也白鹿東觀漢記曰安帝延光三年潁川上言白鹿見嵩山少室因名白鹿峯抱朴子曰鹿壽千年滿五百



古今圖書集成  
歲則色白陸佃埤雅曰爾雅麋曰其跡躔鹿曰其跡  
速麋曰其跡解兔曰其跡迺豕曰其跡刻狐曰其跡  
瓜蓋麋性迷惑故其跡躔而不解麋性散驚故其跡  
解而不躔鹿性決驟故其跡速而不瓜狐性遲疑故  
其跡瓜而不速豕性追突故其跡刻兔性跳躑故其  
跡迺迺音剛瓜音狃

麋形如小鹿有香故字從鹿從射埤雅曰虎豹之文  
來田獐麋之香來射則皮與臍之爲累也陶氏曰麋  
形如獐今俗謂之香獐焦氏曰我生之初人多而物

亦多山獸之肉日登於俎自大疫大荒大兵後人少  
而物亦少獐鹿之脯日久不覩亦盛衰之感也

獐穴地中常以夜走出田野覓食鷄鳴卽還其行皆  
有熟路土人覓其穴置置於穴口鷄鳴時縱犬嗾之  
奔而入穴卽獲焉其肉膾甚不能多啖也

貉字林曰貉善睡其營窟與獐同皆爲曲穴以避雨  
暘亦以防患淮南子曰螿知爲埳獐貉爲曲穴

兔說文無兔字以免爲兔兔生自口出宜有畱難吐  
而後免故字通爲免俗作兔非今產乳曰兔亦謂之



古今圖書集成  
分婉兔足前卑後倨其形俛故俛又從兔也冕亦從  
兔古之說冕者以爲位彌高志彌俛嵩土獵兔者雪  
後多獲前足短故也

鳳凰舊志云唐高宗末淳元年幸嵩山有鳳凰飛集  
峰上因名鳳凰峰按鳳出東方君子之國見則天下  
安寧禽經曰青鳳謂之鶡赤鳳謂之鶡黃鳳謂之鶡  
白鳳謂之鶡紫鳳謂之鶡一曰青鳳謂之鸞山海經  
曰鸞鳥自歌鳳鳥自舞

鶴太室之上有三鶴峰又有白鶴觀飲鶴池淮南子

曰鷄知將日鶴知夜半其鳴高亮聞八九里禽經曰  
鶴以怨望鴟以貪顧鷄以嗔睨鴨以怒瞋雀以猜瞿  
燕以狂眈視也鸞以喜囀鳥以悲啼鳶以飢鳴鶴以  
絜唳鳧以凶叫鴟以愁嘯鳴也

鵲莊子曰烏鵲孺魚傳沐鵲傳枝少欲故曰孺淮南  
子曰太陰所建蟄蟲首穴而處鵲巢向而不背卑雅  
曰歲多風鵲去喬木巢傍枝故能高而不危也爾雅  
曰鵲鴟醜其飛也鸞翅竦上下也鳶鳥醜其飛也翔  
布翅翺翺也鷹隼醜其飛也翬鼓翅翬翬然疾也鳧



雁醜其足蹠脚指間有幕蹠屬相著也其踵企飛卽伸其脚跟企直也鳥鵠醜其掌縮飛縮脚腹下也亢鳥隴隴謂喉隴亢卽咽也其嘒嘒者受食之處別名嘒今江東呼嘒焦氏曰此與釋鹿一段皆詳飛走之情文字奇奧故備志之

鴈夏小正曰雁北鄉鄉者何也鄉其居也法言曰能往能來者朱鳥之謂與燕一名元鳥雁一名朱鳥元鳥以春分來朱鳥以春分去嵩山得地氣之中鳥咸應時去來焉

白雀裴灌少林寺碑武德中寺中有白雀見貞觀中白雀復見孝經援神契王者奉己約儉臺榭不侈尊事耆老則白雀見

翬爾雅曰伊洛而南素質五采皆備成章曰翬翬雉屬左傳曰五雉爲五工正翬其一也

隼乃鷁屬化書曰鳥反哺仁也隼憫胎義也蓋隼之擊物遇懷胎者輒釋不戮也

鴿陸佃埤雅云鴿喜合凡鳥皆雄乘雌鳴此鳥雌乘雄鳴又雀四時有子鴿逐月有子土人爲室以居之

古今圖書集成  
如養鷄鵝然供賓客不窮

白蝙蝠爾雅曰蝙蝠伏翼廣雅曰伏翼飛鼠仙鼠蠖  
蠓也天中記云伏翼百歲色赤千歲色白嵩山山洞  
有之見白居易詩

龍蟲莫智於龍有鱗曰蛟龍有翼曰應龍有角曰蚪  
龍太室山之東有九龍潭相傳爲羣龍所棲遊者不  
敢笑語瀆之龍怒則有雷恐唐武后刻石封禪壇戒  
之

蛟陸佃埤雅曰蛟龍屬狀似蛇四足細頸頸有白嬰

大者數圍卵生眉交亦能交首尾束物故謂之蛟述  
異記曰蟒蛇目圓蛟眉連生

蟒爾雅曰蟒王蛇王蛇大蛇也少室倚箔山洞有大  
蛇張居己一日行洞中覺地軟捫之乃行大蛇背上  
山海經浮戲之山有蛇谷

三足鼈山海經大苦之山狂水出焉中多三足鼈

鯀魚山海經少室之山休水出焉中多鯀魚

鱸魚狀似鮒魚見山海經

騰魚狀似鰕居遼蒼文赤尾見山海經



古今圖書集成  
蜥易說文曰蜥易蠃蜓守宮也象形博物志曰以朱  
飼之其體盡赤搗之萬杵以點女人終身不滅如赤  
誌偶則落故曰守宮舊說蜥易嘔雹夷堅志載劉居  
中隱嵩山見蜥易作雹



